

**Muhyiddin Lancar Dana Pinjaman Untuk Penduduk Kampung Baru
Bernama
Julai 21, 2011**

TEMERLOH: Timbalan Perdana Menteri Tan Sri Muhyiddin Yassin pada Khamis melancarkan program Dana Pinjaman untuk penduduk kampung baru bernilai RM100 juta yang bakal memberi manfaat kepada kira-kira 1.2 juta penduduk kampung-kampung baru di seluruh negara.

Objektif program berkenaan adalah untuk membantu penduduk kampung baru memiliki hartanah dan seterusnya meningkatkan taraf sosial mereka menerusi aktiviti perniagaan, serta menaik taraf rumah penduduk.

Ketika berucap melancarkan dana berkenaan, Muhyiddin berkata pelancaran dana itu bukanlah bertujuan untuk memancing undi kaum Cina menjelang pilihan raya umum akan datang, sebaliknya adalah usaha berterusan kerajaan membantu semua kaum di negara ini.

"Kita harap jangan ada pihak putar belit yang pelancaran dana ini hanya nak dapatkan sokongan orang Cina," katanya ketika berucap di hadapan lebih 2,000 penduduk kampung baru dari sekitar Mentakab, di sini.

Turut hadir Menteri Besar Pahang Datuk Seri Adnan Yaakob dan Menteri Perumahan dan Kerajaan Tempatan Datuk Wira Chor Chee Heung.

Dana berjumlah RM100 juta adalah bagi Rancangan Malaysia Ke-10 iaitu dari tahun 2011 hingga 2015 yang bakal memberi manfaat kepada 607 kampung baru di seluruh negara.

Sebanyak RM15 juta diperuntukkan bagi tahun 2011, RM35 juta bagi tahun 2012, dan RM50 juta bagi tahun 2013 hingga 2015.

Sementara itu, Chor berkata program dana itu meliputi tiga komponen iaitu Skim A: Pinjaman bagi membiayai bayaran premium dan memperbaharui tempoh pajakan tanah kediaman, Skim B: Pinjaman perniagaan mikro dan Skim C: pinjaman menaik taraf rumah.

"Melalui dana ini, kerajaan berharap beban penduduk untuk membayar premium dan memperbaharui tempoh pajakan tanah dan menaik taraf rumah yang uzur dapat diatasi.

"Selain itu dana pinjaman bagi perniagaan kecil dapat meningkatkan kegiatan ekonomi setempat khususnya bagi penduduk golongan muda di kampung baru," katanya.-

BERNAMA

Hakcipta Terpelihara © 1995-2011 Star Publications (Malaysia) Bhd

Source:

http://www.mstar.com.my/berita/cerita.asp?file=/2011/7/21/mstar_berita/20110721173844&sec=mstar_berita